

ՌԱՖԻԿ ԳՐԻԳՈՐՅԱՆ

ԵՊՀ իրավագիտության ֆակուլտետի
քաղաքացիական իրավունքի ամբիոնի ասպիրանտ



**ՊԱՐՏԱՏՈՄՄԻ ՀԱՄԿԱՅՈՒԹՅՈՒՆԸ
ԵՎ ԻՐԱՎԱԿԱՆ ԲՆՈՒՅԹԸ**

ՀՀ օրենսդրությամբ հստակ կարգավորված չէ պարտատոմսով հավաստվող իրավունքների իրավա-
կան բնույթը և դրանով միջնորդավորվող հարաբերությունների նկատմամբ կիրառելի իրավունքը: Սույն
հոդվածով հեղինակը քննարկում է պարտատոմսի հասկացությունը, ընդգծում է, որ, բացի գույքային իրա-
վունքներից, պարտատոմսը կարող է ընձեռել նաև ոչ գույքային իրավունքներ: Պարտատոմսով հավաստ-
վող գույքային հարաբերությունները իրենց բնույթով փոխառության հարաբերություններ են, և հեղինակը
առաջարկում է, որ պարտատոմսը տիրապետողի և այն թողարկողի միջև հարաբերությունների նկատ-
մամբ կիրառվեն փոխառության հարաբերությունները կարգավորող կանոնները, սակայն եթե այլ հատուկ
կարգավորում նախատեսված չէ օրենքով կամ պարտատոմսի թողարկման պայմաններով:

Հիմնարարներ- պարտատոմս, փոխառություն, գույքային իրավունքներ, ոչ գույքային իրավունքներ:

Քաղաքացիական շրջանառության մեջ ար-
ժեթքերը՝ որպես քաղաքացիաիրավական հարա-
բերությունների օբյեկտներ, ունեն մի շարք տնտե-
սական և իրավական գործառույթներ, և ներկայիս
տնտեսությունը հնարավոր չէ պատկերացնել
առանց արժեթքերի: Դրանց դերը, կախված տե-
սակից, կարող է տարբեր լինել. սկսած փոխառու-
թյան հետ կապված հարաբերությունների միջնոր-
դավորումից (պարտատոմս, մուրհակ) մինչև ապ-
րանքաշրջանառության աջակցությունը (պահես-
տային վկայագիր, կոնոսամենս և այլն) և կապի-
տալի ներգրավումը (բաժնետոմս, ներդրումային
ֆոնդի փայ և այլն): Արժեթուղթը կարող է հավաս-
տել ինչպես պարտավորական իրավունքներ, այն-
պես էլ կորպորատիվ և իրային իրավունքներ :

Պարտատոմսը ներդրումային (ինվեստիցիոն)
արժեթուղթ է, որի հիմնական նպատակը թողարկո-
ղի համար փոխառու միջոցների ներգրավումն է,
իսկ ներդրողի համար՝ տոկոսների կամ գույքային
այլ համարժեքի տեսքով շահույթի ստացումը²: Հա-
յաստանի Հանրապետության քաղաքացիական
օրենսգրքի 154-րդ հոդվածի համաձայն՝ *պարտա-
տոմս է համարվում այն արժեթուղթը, որը հավաս-
տում է դրա տիրապետողի իրավունքը՝ դրանում
նախատեսված ժամկետում պարտատոմս թողար-
կած անձից ստանալ պարտատոմսի անվանական
արժեքը կամ գույքային այլ համարժեք: Պարտա-
տոմսը դրա տիրապետողին իրավունք է տալիս
նաև ստանալ պարտատոմսի անվանական արժե-
քից տոկոս կամ այլ գույքային իրավունքներ:* Քա-
ղաքացիական օրենսգրքի՝ պարտատոմսի հասկա-
ցությունը իր մեջ պարունակում է պարտատոմսին
հատուկ ներդրողի հիմնական գույքային իրա-
վունքները՝ ստանալ պարտատոմսի անվանական
արժեքը (կամ գույքային այլ համարժեք), ինչպես

նաև անվանական արժեքից տոկոս կամ այլ գույ-
քային իրավունք: Պարտատոմսի անվանական
արժեքը (principal) այն գումարն է, որը թողարկողը
պարտք է վերցնում ներդրողից³, և որի նկատմամբ
են հաշվարկվում որպես եկամուտ վճարվող տոկոս-
ները: Ավելի պարզ ասած՝ պարտատոմսի անվա-
նական արժեքը այն գումարն է, որը սահմանված է
պարտատոմսի թողարկման որոշմամբ և, որպես
կանոն, տրամադրվում է պարտատոմսի սեփակա-
նատիրոջը դրա մարման ժամանակ: Ընդ որում՝
պարտադիր չէ, որ պարտատոմսը վաճառվի ան-
վանական արժեքի գնով. այն կարող է վաճառվել և՛
դրանից ցածր գնով (դիսկոնտի դեպքում), և՛ դրա-
նից բարձր գնով, սակայն ամեն դեպքում տոկոսնե-
րը հաշվարկվում են անվանական արժեքի նկատ-
մամբ և վերջնական պարտատոմսի մարում տեղի է
ունենում անվանական արժեքով: Պարտատոմսի
հասկացությամբ սահմանված է նաև, որ պարտա-
տոմսը տիրապետողը կարող է անվանական արժե-
քի փոխարեն ստանալ թողարկողից գույքային այլ
համարժեք: Գույքային այլ համարժեքի օրինակ
կարող է լինել Ռուսաստանում գործող ոսկե սերտի-
ֆիկատները, որոնք հանդիսանում են պետական
պարտատոմսեր և պարտատոմսի մարման դեպ-
քում ներդրողը ստանում է պետական ստանդար-
տացված ձուլակտոր⁴: Գույքային այլ համարժեքի
հետ գործ ունենք նաև փոխարկվող պարտատոմ-
սերի դեպքում, երբ պարտատոմսի թողարկման
պայմաններով նախատեսված է, որ դրանք կարող
են փոխարկվել թողարկող ընկերության բաժնե-
տոմսերի: Արդյունքում պարտատոմսի սեփակա-
նատերը ստանում է ոչ թե պարտատոմսի անվա-
նական արժեքը, այլ դրան համարժեք ընկերության
բաժնետոմս:

Բացի անվանական արժեքից՝ պարտատոմսի

ԱՐԴԱՐԱԴԱՏՈՒԹՅՈՒՆ

սեփականատերը իրավունք ունի ստանալու նաև անվանական արժեքից տոկոս կամ այլ գույքային իրավունքներ: Տոկոսը կամ այլ գույքային իրավունքը հենց այն օգուտն է, որը հիմնականում շահագրգռում է ներդրողին գնել այդ պարտատոմսը: Պարտատոմսի սեփականատերը, բացի տոկոսից, կարող է ունենալ նաև այլ գույքային իրավունքներ, որոնք պայմանավորված են թողարկվող պարտատոմսի տեսակից և թողարկման պայմաններից: Օրինակ՝ գեղջատկոսային (դիսկոնտային) պարտատոմսերի դեպքում ներդրողը չի ստանում տոկոսներ, այլ պարտատոմսը գնում է անվանական արժեքից ցածր գնով, իսկ պարտատոմսի մաքրման ժամանակ ստանում է անվանական արժեքը:

Քաղաքացիական օրենսգիրքը սահմանափակվում է միայն պարտատոմսի սեփականատերերի գույքային իրավունքներ ունենալու հնարավորության նախատեսմամբ՝ անտեսելով պարտատոմսերի սեփականատերերի ոչ գույքային իրավունքները: Պարտատոմսերի սեփականատերերը մի շարք դեպքերում ունեն նաև ոչ գույքային իրավունքներ: Օրինակ՝ «Ապահովված հիփոթեքային պարտատոմսերի մասին» ՀՀ օրենքի 13-րդ հոդվածը սահմանում է, որ թողարկողը պարտավոր է կազմել, Կենտրոնական բանկ ներկայացնել և իր ինտերնետային տնային էջում հրապարակել այդ օրենքով սահմանված կարգով հիփոթեքային պարտատոմսերի թողարկման առնչությամբ կազմված եռամսյակային հաշվետվություններ, որոնցում պարտադիր ներառվող տեղեկությունները սահմանվում են օրենքով: Այս դեպքում պարտատոմսերի վերաբերյալ տեղեկություններ ստանալու իրավունքը պարտատոմսերի սեփականատերերի իրավունքն է, որից էլ կարող է կախված լինել վերջիններիս հետագա գործողությունները. վաճառել պարտատոմսերը կամ օգտվել պարտատոմսերի ընձեռած այլ իրավունքներից: Պետք է ընդգծել, որ մի շարք երկրների օրենսդրություններ պարտատոմսերի սեփականատերերին, բացի գույքային իրավունքներից, ընձեռում են նաև ոչ գույքային իրավունքներ: Այսպես՝ Անգլիայում պարտատոմսերի սեփականատերերը իրավունք ունեն ստանալ թողարկողի հաշվապահական հաշվեկշիռը, իսկ արտակարգ դեպքերում նույնիսկ կարող են ստանալ ընկերության բարձրագույն կառավարման մարմնում քվեարկության իրավունք, Բելգիայում՝ մասնակցել բաժնետերերի ժողովին և ստանալ տեղեկատվություն ժողովի վերաբերյալ, Իսպանիայում և Շվեյցարիայում՝ ներկայացուցչի միջոցով մասնակցել ընկերության կառավարման մարմինների աշխատանքին՝ խորհրդակցական ձայնի իրավունքով, Ռուսաստանում՝ պարտատոմսի սեփականատերերը իրավունք ունեն գումարել պարտատոմսերի սեփականատերերի ժողով, որը կայացնում է մի շարք որոշումներ կապված պարտատոմսերի սե-

փականատերերի իրավունքների հետ, ինչպես նաև նախատեսված է պարտատոմսերի սեփականատերերի ներկայացուցչի ինստիտուտը, որին 2016թ. հուլիսի 1-ից թողարկողը պարտավոր է ներգրավել օրենքով նախատեսված դեպքերում: Այսպիսով՝ օրենքով կամ պարտատոմսի թողարկման պայմաններով պարտատոմսերի սեփականատերերի համար կարող են նախատեսվել մի շարք ոչ գույքային իրավունքներ, ուստի գտնում ենք, որ պարտատոմսի հասկացությունը սահմանելիս անհրաժեշտ է նաև ընդգծել, որ բացի գույքային իրավունքներից՝ պարտատոմսերի սեփականատերերը կարող են ունենալ նաև ոչ գույքային իրավունքներ, այլապես առկա կարգավորումից բխում է, որ պարտատոմսերով կարող են հավաստվել միայն գույքային իրավունքներ: Հետևաբար առաջարկում ենք փոփոխել Քաղաքացիական օրենսգրքի 154-րդ հոդվածի 1-ին մասի 2-րդ նախադասությունը հետևյալ կերպ. «Պարտատոմսը դրա տիրապետողին իրավունք է տալիս նաև ստանալ պարտատոմսի անվանական արժեքից տոկոս կամ այլ գույքային իրավունքներ, ինչպես նաև օրենքով կամ պարտատոմսի թողարկման պայմաններով նախատեսված դեպքերում՝ նաև ոչ գույքային իրավունքներ»:

Պարտատոմսը իրենից ներկայացնում է փոխառու միջոցների ներգրավման գործիք: Այլ կերպ ասած՝ պարտատոմսը արժեթուղթ է, որով հավաստվում են փոխառությամբ պայմանավորված հարաբերություններ արժեթուղթը տիրապետողի և այն թողարկող անձի միջև: Բայց արդյոք պարտատոմսը հանդիսանում է փոխառություն, կամ, այլ կերպ ասած, Քաղաքացիական օրենսգրքով սահմանված փոխառության գլխի կանոնները կիրառելի են պարտատոմսերի նկատմամբ, թե ոչ: Այս հարցի պատասխանը ՀՀ օրենսդրությամբ միանշանակ չէ: Քաղաքացիական օրենսգիրքը չի սահմանում, որ պարտատոմսի սեփականատիրոջ և թողարկողի միջև հարաբերությունների նկատմամբ կիրառելի են փոխառության հարաբերությունները կարգավորող գլուխ 46-ի կանոնները: Սակայն Քաղաքացիական օրենսգիրքը մի շարք դեպքերում սահմանում է նորմեր, որոնցից բխում է, որ պարտատոմսերով հավաստվում են փոխառության հետ կապված հարաբերություններ: Այսպես՝ Քաղաքացիական օրենսգրքի 885-րդ հոդվածի 3-րդ մասի համաձայն՝ պետական փոխառության պայմանագիրը կնքվում է փոխառուի թողարկված *պետական այն պարտատոմսերը կամ պետական այլ արժեթղթերը փոխառուի կողմից ձեռք բերելու միջոցով*, որոնք հավաստում են դրամական միջոցները, այլ գույքը, սահմանված տոկոսները կամ այլ գույքային իրավունքները փոխառության թողարկման պայմաններով նախատեսված ժամկետներում փոխառուից ստանալու փոխառուի իրավունքը: Բացի այդ՝ Քաղաքացիական օրենսգրքի 886.1.-րդ հոդ-

վածը սահմանում է, որ *փոխառության պայմանագրով, այդ թվում՝ պարտատոմսերի թողարկման և վաճառքի պայմաններով*, կարող է նախատեսվել, որ փոխառուի լուծարման դեպքում փոխառուի պահանջները ենթակա են բավարարման փոխառուի մյուս բոլոր պարտատերերի պահանջները բավարարվելուց հետո (ստորադաս փոխառություն): Այս երկու նորմերը թույլ են տալիս եզրակացնել, որ ամեն դեպքում Քաղաքացիական օրենսգրքը ճանաչում է այն փաստը, որ պարտատոմսով հավաստվում են փոխառության հետ կապված հարաբերություններ: Արդյո՞ք այս ամենը բավարար է, որպեսզի պարտատոմսի սեփականատիրոջ և թողարկողի միջև հարաբերություններում կիրառվեն փոխառության վերաբերյալ նորմերը: Այլ կերպ ասած՝ պարտատոմսը թողարկողի և դրա գնորդի միջև հարաբերություններում պետք է կիրառվեն փոխառության այնպիսի կանոններ, ինչպիսիք են, օրինակ, փոխառության տոկոսներին վերաբերող կանոնները (Քաղաքացիական օրենսգրքի 879-րդ հոդված), փոխառության պայմանագիրը խախտելու (Քաղաքացիական օրենսգրքի 881-րդ հոդված) կամ փոխառուի պարտավորության ապահովման կորստի հետևանքների վերաբերյալ նորմերը (Քաղաքացիական օրենսգրքի 883-րդ հոդված) և այլն: Օրինակ՝ Քաղաքացիական օրենսգրքի 881-րդ հոդվածի համաձայն՝ եթե փոխառության պայմանագրով նախատեսված է փոխառությունը վերադարձնել մաս առ մաս (տարաժամկետ), ապա փոխառուի կողմից փոխառության հերթական մասը վերադարձնելու համար որոշված ժամկետը խախտելու դեպքում փոխառուն իրավունք ունի պահանջել վերադարձնել փոխառության մնացած ամբողջ գումարը՝ հասանելիք տոկոսների հետ միասին: Այս կանոնը կիրառելով՝ արդյո՞ք հնարավոր է վաղաժամկետ պահանջել պարտատոմսի անվանական արժեքը և հասանելիք տոկոսներ, եթե թողարկողը խախտում է արժեկտրոնային պարբերական վճարները վճարելու պարտականությունը:

Այս խնդրի կապակցությամբ ՀՀ կենտրոնական բանկի խորհուրդը 2012թ. հունիսի 12-ին թիվ 5 պարզաբանմամբ՝ պատասխանելով այն հարցին, թե արդյոք կարող են թողարկվել ՀՀ-ում կարգավորվող շուկային թույլատրված կամ թույլատրման ենթակա արտարժույթով արտահայտված պարտատոմսեր, ինչպես նաև դրանց դիմաց արտարժույթով իրականացվել վճարումներ, նշել է, որ պարտատոմսերի տեղաբաշխումն իրենից ներկայացնում է փոխառության ներգրավման ձև և ՀՀ ԿԲ խորհուրդը *արժութային կարգավորման տեսանկյունից տարբերություն չի դնում պարտատոմսերի և փոխառությունների միջև* և պարտատոմսերի համար կիրառելի է համարում «Արժութային վերահսկողության և արժութային կարգավորման մասին»

ՀՀ օրենքով¹⁰ փոխառությունների համար նախատեսված կարգավորումները: ՀՀ կենտրոնական բանկի խորհուրդը գտել է, որ միայն կարգավորվող շուկայում առևտրին թույլատրված կամ ազդագրի («Արժեթղթերի շուկայի մասին») ՀՀ օրենքի համաձայն ազդագրի հրապարակման պահանջից բացառությունների և/կամ ոչ հրապարակային թողարկման դեպքում՝ թողարկման պայմանների) համաձայն՝ կարգավորվող շուկայում առևտրին թույլատրման ենթակա պարտատոմսերի արտահայտումը արտարժույթով (ներառյալ՝ անվանական արժեքի նախատեսումը), այդ պարտատոմսերի ձեռքբերման ժամանակ վճարումները և այդ պարտատոմսերի մարումը կարող են կատարվել արտարժույթով, իսկ մնացած պարտատոմսերը՝ ոչ: Ընդ որում՝ արտարժույթով արտահայտված պարտատոմսերի թողարկման, տեղաբաշխման, շրջանառության և մարման հետ կապված հարաբերությունների նկատմամբ կիրառվում են փոխառությունների (վարկերի) համար «Արժութային վերահսկողության և արժութային կարգավորման մասին» ՀՀ օրենքով նախատեսված կանոնները: Այսպիսով՝ ՀՀ կենտրոնական բանկը գտել է, որ պարտատոմսը փոխառության ներգրավման ձև է և դրա թողարկման, տեղաբաշխման, շրջանառության և մարման հետ կապված հարաբերությունների նկատմամբ կիրառելի են կոնկրետ օրենքով նախատեսված փոխառության վերաբերյալ կանոնները: Ի հակադրություն վերը նշվածին՝ ՀՀ վճարակ դատարանը 2014թ. մայիսի 8-ին թիվ ԵԱԶԳ-1459/02/10 քաղաքացիական գործով արտահայտել է հետևյալ դիրքորոշումը. «հետապնդվող նպատակի առումով ինչպես փոխառությունը, այնպես էլ պարտատոմսը փոխառու միջոցների ներգրավման ձևեր են: Մասնավորապես՝ թե՛ փոխառության պայմանագրի և՛ թե՛ պարտատոմսի պարագայում խոսքը գնում է ապրանքային շրջանառության մի մասնակցի կողմից մյուսին հատուցմամբ և վերադարձնելու պայմանով դրամ կամ այլ գույք տալու մասին: Այդուհանդերձ, պետք է փաստել, որ ապրանքային շրջանառության մասնակիցների միջև փոխառության տնտեսական ընդհանրության առկայության պայմաններում տարբեր են փոխառության պայմանագրի և պարտատոմսի իրավական ձևակերպումները և կարգավորումները: Այսպես, օրինակ, եթե փոխառության պայմանագիրը կնքվում է իրավահարաբերության կողմերի միջև, ապա պարտատոմսը թողարկում է էմիտենտը. ընդ որում, եթե փոխառության պայմանագրի կողմերը՝ փոխառուն և փոխառուն, հայտնի են ի սկզբանե, ապա պարտատոմսի դեպքում երբեմն հայտնի չէ, թե ով է լինելու դրա տիրապետողը, եթե փոխառության պայմանագիրը կնքվում է հասարակ գրավոր ձևով, ապա օրենքով սահման-

www.journal.lawinstitute.am

ԱՐԴԱՐԱԴԱՏՈՒԹՅՈՒՆ

ված են պարտատոմսի որոշակի պարտադիր վավերապայմաններ և այլն: *Հետևաբար, փոխառության պայմանագիրը և պարտատոմսը չեն կարող նույնացվել քաղաքացիաիրավական կարգավորման էական տարբերությունների պատճառով*¹¹: Այսպիսով, ՀՀ վճռաբեկ դատարանը գտել է, որ թեև պարտատոմսը և փոխառության պայմանագիրը համարվում են փոխառու միջոցների ներգրավման ձևեր, այնուամենայնիվ՝ դրանք չեն կարող նույնացվել քաղաքացիաիրավական կարգավորման էական տարբերությունների պատճառով:

Տարբեր երկրների օրենսդրությունները նույնպես չեն հստակեցնում՝ պարտատոմսը ամեն դեպքում հանդիսանո՞ւմ է փոխառության հավաստում, թե՞ ոչ: Օրինակ՝ Գերմանիայի օրենսդրությամբ պարտատոմսը ճանաչվում է որպես փաստաթուղթ, որի թողարկողը պարտավորվել է վճարել փաստաթղթում խոստացված գումարը այն տիրապետողին¹²: Ֆրանսիայի առևտրային օրենսգրքի համաձայն՝ պարտատոմսերը շրջանառության ենթակա արժեթղթեր են, որոնք մեկ թողարկման ներքո տրամադրում են նույն պարտավորական իրավունքները նույն անվանական արժեքի նկատմամբ¹³:

Սակայն Ռուսաստանում գործող քաղաքացիական օրենսգրքի 816-րդ հոդվածը սահմանում է, որ օրենքով կամ այլ իրավական ակտերով նախատեսված դեպքերում, փոխառության պայմանագիրը կարող է կնքվել պարտատոմսի թողարկման և վաճառքի եղանակով: *Պարտատոմս թողարկողի և այն տիրապետողի միջև հարաբերությունները կարգավորվում են փոխառության պարագրաֆի նորմերով այնքանով, որքանով այլ բան սահմանված չէ օրենքով կամ օրենքով սահմանված կարգով*¹⁴:

Քաղաքացիական օրենսգրքի 877-րդ հոդվածի 1-ին մասի համաձայն՝ փոխառության պայմանագրով մեկ կողմը (փոխատուն) մյուս կողմի (փոխառուի) սեփականությանն է հանձնում դրամ կամ տեսակային հատկանիշով որոշվող այլ գույք, իսկ փոխառուն պարտավորվում է փոխատուին վերադարձնել միևնույն գումարի դրամ (փոխառության գումարը) կամ փոխատուից ստացված գույքին հավասար քանակի և նույն տեսակի ու որակի գույք: Քաղաքացիական օրենսգրքի 878-րդ հոդվածը սահմանում է, որ փոխառության պայմանագիրը կնքվում է գրավոր: Ի հավաստումն փոխառության պայմանագրի և դրա պայմանների՝ կարող է ներկայացվել փոխառուի տված ստացականը կամ փոխատուի կողմից փոխառուին որոշակի դրամական գումար կամ որոշակի քանակի գույք տալը հավաստող այլ փաստաթուղթ: Տվյալ դեպքում պարտատոմսի վաճառքի պայմանագրով մեկ կողմը (գնորդը) մյուս կողմին (թողարկողին) տրամադրում է որոշակի գումար հետագայում պարտատոմսի ան-

վանական արժեքը և (կամ) տոկոս կամ գույքային այլ համարժեք ստանալու պայմանով: Իսկ փոխառության կանոնների համաձայն փոխառուին որոշակի դրամական գումար տալը կարող է հավաստվել ցանկացած փաստաթղթով, ինչը այս դեպքում կարող է հանդիսանալ պարտատոմսը: Գրականության մեջ նույնպես առկա է այն կարծիքը, որ պարտատոմսը, ինչպես նաև մուրհակը, կարող են հանդիսանալ այն փաստաթղթերը, որոնք հավաստում են փոխառության հարաբերությունների առկայությունը¹⁵: Քաղաքացիական օրենսգրքի 146-րդ հոդվածի համաձայն՝ արժեթուղթը, սահմանված ձևի և պարտադիր վավերապայմանների պահպանմամբ, գույքային իրավունքները հավաստող փաստաթուղթ է: Այսինքն՝ պարտատոմսի՝ որպես արժեթղթի էությունն է հանդիսանում գույքային, տվյալ դեպքում՝ պարտավորական, իրավունքներ հավաստելը: Ուստի գտնում ենք, որ պարտատոմսը պետք է հանդիսանա փոխառության հարաբերությունների և փոխառության պայմանագրի առկայության փաստը հավաստող փաստաթուղթ: Սակայն, այս դեպքում տարբեր է փոխառության հարաբերությունների ծագման հիմքը: Ինչպես գրում է Օ. Վ. Իշուտինան, պարտատոմսով հավաստված փոխառության պարտավորությունը ծագում է արժեթղթի առուվաճառքի պայմանագրի կնքելու, ոչ թե փոխառության պայմանագրի արդյունքում¹⁶: Իսկ Ե. Բ. Ռադչենկոն նշում է, որ պետական պարտատոմսի առուվաճառքի պայմանագիրը դրա առաջնային տեղաբաշխման ժամանակ պետք է համարել փոխառության պայմանագրի հատուկ տարատեսակ և դրա կնքման ժամանակ պետք է կիրառել քաղաքացիական օրենսգրքի փոխառության վերաբերյալ կանոնները¹⁷: Գտնում ենք, որ պարտատոմսի առուվաճառքի պայմանագրի նկատմամբ չի կարելի կիրառել փոխառության պայմանագրի կանոնները, քանի որ դրանք իրենց բնույթով էականորեն տարբեր նշանակություն և կարգավորում ունեն. փոխառության հարաբերությունները բխում են հենց պարտատոմսի էությունից, դրա գործառույթներից: Փոխառության հարաբերությունները այս դեպքում առաջանում են պարտատոմսի առուվաճառքի արդյունքում¹⁸: Նշենք, որ փոխառության հարաբերությունները կարող են կարգավորել միայն թողարկողի և պարտատոմս տիրապետողի հարաբերությունները՝ կապված գումարի և տոկոսների փոխառության ու վերադարձման հետ, բայց ոչ պարտատոմսի գնման հետ կապված հարաբերությունները:

Այսպիսով, գտնում ենք, որ պարտատոմսի թողարկողի և դրա տիրապետողի միջև առաջացող հարաբերությունների նկատմամբ պետք է կիրառվեն փոխառության վերաբերյալ կանոնները: Սակայն այդ կանոնները պետք է կիրառվեն պարտատոմսերից բխող հարաբերությունների նկատմամբ

միայն լրացուցիչ կարգով, եթե այլ բան սահմանված չէ օրենքով և պարտատոմսի թողարկման պայմաններով, քանի որ պարտատոմսերը ունեն իրենց կարգավորման առանձնահատկությունները, և պետք է առաջնություն տրվեն այդ հատուկ կարգավորումներին, որոնց բացակայության պայմաններում նոր միայն կիրառվեն փոխառությանը վերաբերող կանոնները: Օրինակ՝ «Ապահովված հիփոթեքային պարտատոմսերի մասին» ՀՀ օրենքի՝ 8-րդ հոդվածի համաձայն, եթե ապահովված հիփոթեքային պարտատոմսերի ապահովման միջոց հանդսացող ակտիվները դուրս են գրվում ապահովման միջոցների ռեզիստրից, ապա թողարկողը պարտավոր է նույն աշխատանքային օրվա ընթացքում փոխարինել այդ ակտիվները այլ ակտիվներով, իսկ Քաղաքացիական օրենսգրքի 883-րդ հոդվածի համաձայն՝ փոխառության գումարը վերադարձնելու ապահովման կորստի կամ դրա պայմանների վատթարացման այնպիսի հանգամանքներում, որոնց համար փոխատուն պատասխանատվություն չի կրում. վերջինս իրավունք ունի փոխառուից պահանջել վաղաժամկետ վերադարձնելու փոխառության գումարը և վճարելու հասանելիք տոկոսները, եթե այլ բան նախատեսված չէ պայմանագրով: Այս դեպքում ակնհայտ է, որ

պետք է գերակայություն տալ «Ապահովված հիփոթեքային պարտատոմսերի մասին» ՀՀ օրենքով նախատեսված կարգավորման, և փոխառության համար սահմանված ընդհանուր նորմերը պետք չէ կիրառել:

Հիմք ընդունելով վերոգրյալը՝ առաջարկում ենք Քաղաքացիական օրենսգրքով կարգավորել այս հարցը՝ սահմանելով, որ պարտատոմսով հավաստվում են կողմերի միջև փոխառության հարաբերությունների առկայությունը, և դրա հետ կապված հարաբերություններում կիրառվում են փոխառության հետ կապված Քաղաքացիական օրենսգրքի նորմերը, եթե այլ բան նախատեսված չէ օրենքով կամ պարտատոմսի թողարկման պայմաններով: Այսպես՝ Քաղաքացիական օրենսգրքի 154-րդ հոդվածը առաջարկում ենք լրացնել 3-րդ մասով և շարադրել հետևյալ կերպ. «3. Պարտատոմսով հավաստվում է այն թողարկողի և տիրապետողի միջև փոխառության հարաբերությունների առկայությունը, և դրանց նկատմամբ կիրառվում են սույն օրենսգրքի 46-րդ գլխի՝ փոխառության մասին կանոնները, եթե այլ բան սահմանված չէ օրենքով կամ պարտատոմսի թողարկման պայմաններով:»

¹ Տե՛ս Суханов Е. А. Российское гражданское право: Учебник: В 2 т. Т. I: Отв. ред. Е. А. Суханов. 4-е изд., стереотип. Москва: Статут, 2015, С. 322.
² Տե՛ս Корчагин Ю. А. Рынок ценных бумаг. 2-е изд., доп. и перераб. Ростов-на-Дону: Феникс, 2008. С. 42.
³ Տե՛ս Берзона Н. И. Рынок ценных бумаг: Учебник для бакалавров. 3-е изд., Москва, Издательство Юрайт, 2013, С. 114.
⁴ Տե՛ս Постановление Правительства РФ от 27.07.1998 N 861 “О Генеральных условиях эмиссии и обращения государственных облигаций, погашаемых золотом” (https://www.consultant.ru/document/cons_doc_LAW_19637/04e5083825bea0ac15e3822d85bb52be4ffa0d3f/)
⁵ Տե՛ս Аюпов А.А., Иванов М.Е., Белобородова М.А.. Рынок ценных бумаг: учебное пособие. Казань: “Отечество”, 2013, С. 29.
⁶ Տե՛ս Майфат А.В. Гражданско-правовые конструкции инвестирования: монография, Москва. Волтерс Клувер, 2006. С. 75-76.
⁷ Տե՛ս Федеральный закон от 22.04.1996 N 39-ФЗ (ред. от 30.12.2015) “О рынке ценных бумаг”, գլուխ 6.1 (https://www.consultant.ru/document/cons_doc_LAW_10148/):
⁸ Տե՛ս Դավթյան Տ.Մ. Արժեթղթերով գործառնություններ, Երևան: Տիգրան Մեծ, 2003. էջ 56:
⁹ Տե՛ս <https://www.cba.am/AM/lagovernmentalclarificationscouncil/parz%205.pdf> :
¹⁰ Ընդունվել է 24.11.2004թ., ուժի մեջ է մտել 28.06.2005թ.: Տե՛ս ՀՀ ՊՏ 2004.12.28/72(371) Հոդ.1456 ՀՕ-135-Ն:
¹¹ Տե՛ս ՀՀ վճռաբեկ դատարանի 2014թ. մայիսի 8-ին կայացված որոշումը թիվ ԵԱԶԳ/1459/02/10 քաղաքացիական գործով՝ ըստ Նարինե Նալբանդյանի հայցի ընդդեմ «Իտարկո Քոնսթրաքշն» ՓԲԸ-ի, երրորդ անձինք Հրաչ-Ներսես Կապրիելյանի, Վարդան Սիրմաքետսի՝ 04.08.2010 թվականի ընդհանուր ժողովի որոշումն անվավեր ճանաչելու պահանջի մասին:
¹² Տե՛ս Գերմանիայի քաղաքացիական օրենսգիրք՝ հրատարակված 2 հունվարի 2002, հոդված 793 (http://www.gesetze-im-internet.de/englisch_bgb/englisch_bgb.html#p3405):
¹³ Տե՛ս Ֆրանսիայի առևտրային օրենսգիրք, հոդված L. 228-38, (<https://www.legifrance.gouv.fr/Traductions/English/Legifrance-translations>):

- ¹⁴ Տե՛ս Ռ-Գ քաղաքացիական օրենսգիրք (մաս 2) 26.01.1996 N 14-ՂԻ (<http://base.consultant.ru/cons/cgi/online.cgi?req=doc;base=LAW;n=182037>):
- ¹⁵ Տե՛ս Բարսեղյան Ս., Հայկյանց Ա., Ղարախանյան Գ., Մեղրյան Ս. Հայաստանի Հանրապետության քաղաքացիական իրավունք: Երկրորդ մաս. Երկրորդ հրատարակություն՝ փոփոխություններով և լրացումներով.- Երևանի պետ. համալս. Երևան: ԵՊՀ հրատ., 2008. էջ 402:
- ¹⁶ Տե՛ս Ишугина О.В. Государственные и муниципальные ценные бумаги: Вопросы правовой идентификации: Автореф. дисс. ... канд. юрид. наук. Екатеринбург, 2004.
- ¹⁷ Տե՛ս Радченко Е. Б. Государственные ценные бумаги России и США: Автореф. дис. ...канд. юрид. наук. Москва, 2003.
- ¹⁸ Տե՛ս Ашиткова Т. В., Буг Н. Д., Викторов И. С., Звягинцев Д. А., Хаснутдинов А. И. Рынок ценных бумаг: правовое регулирование. Москва: Олма-Пресс, 2002. С. 60.
- ¹⁹ Ընդունվել է 26.05.2008թ., ուժի մեջ է մտել 12.07.2008 թ.: Տե՛ս ՀՀՊՏ 2008.07.02/41(631) Հոդվ.675, ՀՕ-97-Ն:

Рафик Григорян

Аспирант кафедры гражданского права
юридического факультета ЕГУ

РЕЗЮМЕ

Определение облигации и ее правовая природа

Законодательство РА четко не регулирует правовой характер прав от облигаций и применимого права к отношениям, возникшим из облигаций. Автор статьи обсуждает определение облигаций, подчеркивает, что в дополнение к имущественным правам облигация может также давать неимущественные права. Отношения, вытекающие из облигаций являются заемными отношениями по своей природе, и автор предполагает, что отношения между держателем облигаций и эмитентом должны регулироваться правилами займа, если иное специальное регулирование не внесено для облигаций законом или условиями выпуска облигаций.

Ключевые слова: облигация, заем, имущественные права, неимущественные права.

Rafik Grigoryan

Post-Graduate student of Faculty of Law Chair
of Civil Law Yerevan State University

SUMMARY

The definition of bond and its legal nature

The legislation of RA doesn't not clearly settle the legal nature of the rights from bonds and the applicable law to the relations emerging from bonds. The author of the article discusses the definition of a bond, stresses that in addition to property rights the bond may also enable non-property rights. The relationships emerging from bonds are loan relationships by their nature and the author suggests that the relationships between the bondholder and the issuer should be regulated by the rules of the loan, if other special regulation is not settled for bonds by law or by the conditions of bond issuance.

Keywords: bond, loan, property rights, non-property rights.